

Maruah tidak boleh diminta

BH 25 APR 1987

K. LUMPUR, Jumaat—
Maruah sesuatu bangsa tidak boleh dipertahankan semata-mata dengan meminta orang lain jangan menghina bangsa itu, sebaliknya bangsa itu sendiri yang perlu membuktikan ia mempunyai sifat-sifat mulia dan berjaya.

Rakyat yang memiliki sifat mulia dan berjaya dapat mengukuhkan maruah sebagai bangsa yang merdeka, berdaulat dan maju, kata Presiden Umno, Datuk Seri

Dr Mahathir Mohamad, hari ini.

Dalam ucapan dasarnya di Perhimpunan Agung ke-38 Umno di Dewan Merdeka Pusat Dagangan Dunia Putra di sini, Datuk Seri Dr Mahathir berkata:

"Apa ertinya kemerdekaan jika sesiapa saja boleh mengongkang kita? Apa dianya kemerdekaan jika kita letakkan diri kita di bawah telunjuk orang lain.

"Memang benar sebagai sebuah negara kecil pendirian kita tidak akan menggoncang du-

nia, tetapi negara dan bangsa yang bermaruah tidak boleh berdiam diri hanya kerana perbuatan buruk dilakukan oleh kuasa besar.

"Keadilan tidak bererti jika ada pilih kasih atau takut. Ketegasan tidak bermakna jika kita memilih-milih untuk bersikap tegas.

"Amalan sujud kepada sesiapa saja kerana takut atau wang, bukanlah adat yang harus kita kekalkan. Maruah bangsa dan negara perlu kita pertahankan, jika tidak kemerdekaan ti-

dak bermakna," kata beliau.

Menyedari hakikat inilah, kerajaan dan Umno cuba mengenal pasti sebab-sebab kegagalan orang Melayu dalam pelbagai bidang dan antara sebabnya ialah kelemahan yang ketara dalam sifat serta sikap orang Melayu.

Katanya, orang Melayu sudah berjaya dalam bidang politik, tetapi pencapaian mereka dalam bidang agama, sosial dan ekonomi belum begitu memuaskan.

Orang Melayu belum berjaya dalam bidang agama kerana mereka tidak mengamalkan banyak daripada ajaran Islam. Ada antara mereka tidak mahu bersaudara, sering membela-kangkan amanah, tidak begitu bertolak ansur dan tidak memberi penghargaan kepada keadilan.

Di bidang sosial pula, orang Melayu sering memencilkan diri daripada orang lain dan justeru itu, mereka tidak begitu berjaya mempengaruhi sesiapa.

"Kita lebih suka menggunakan kuasa untuk mendapat kerjasma daripada menggunakan kemesraan untuk tujuan yang sama," tegasnya.

Datuk Seri Dr Mahathir berkata, di bidang ekonomi pula, kejayaan orang Melayu amat terhad. Menurutnya, pencapaian 18 peratus Bumiputera dalam bidang itu diperolehi kerana fungsi agensi-agensi kerajaan.